

摘藻堂四庫全書薈要

集部

欽定四庫全書薈要卷一萬八千七百三十五

集部

御定佩文齋詠物詩選卷一百十三

省掖類

五言律

晚出左掖

唐杜甫

晝刻傳呼淺
春旗簇仗齊
退朝花底散
歸院柳邊迷
樓雪融城濕
宮雲去殿低
避人焚諫草
騎馬欲雞棲

春宿左省

杜甫

花隱掖垣暮啾啾棲鳥過星臨萬戶動月傍九霄多不
寢聽金鑰因風想玉珂明朝有封事數問夜如何

省中即事

唐岑參

華省謬為郎蹉跎鬢已蒼到來恒襆被隨例且含香竹
影遮窓暗花陰拂簾涼君王新賜筆草奏向明光

和范秘書省中作

唐喻坦之

清省宜寒夜仙才稱獨吟鐘來宮轉漏月過閣移陰鶴
聲燈前靜芸臺幄外深想知因此興暫動憶山心

五言排律

酬蘇員外味道夏晚寓直省中見贈

唐 沈佺期

並命登仙閣分曹直禮闈
大官供宿膳侍史護朝衣
卷幔天河入開窓月露微
小池殘暑退高樹早涼歸
冠劍無時釋軒車待漏飛
明朝題漢柱三署有光輝

直中書省

唐 韋承慶

清切鳳凰池扶疎雞樹枝
唯應集鸞鷟何為宿鸛雌
大

道乾坤闢深恩雨露垂昆蚊既含養駑駘亦驅馳木偶
翻為用芝泥忽濫窺九思空自勉五字本無施徒喜逢
千載何階答二儀螢光向日盡蚊力負山疲禁宇庭除
閑閑宵鐘箭移暗花臨戶發殘月下簾歌白髮隨年改
丹心為主披命將時並泰言與行俱危寄謝登巢客堯
年復在斯

春日直門下省早朝

唐王維

騎省直明光雞鳴謁建章遙聞侍中珮暗識令君香玉

漏催銅史天書拜夕郎
旌旗映闔闔歌吹滿昭陽
官舍梅初紫宮門柳欲黃
願將遲日意同與聖恩長

省中書事

元
王士熙

玉京長夏裏畫省五雲邊
終日身無事清時職是仙
縹緲分馬乳銀葉薦龍涎
細草煙籠罽垂楊雪妬綿
客懷天外鶴農事雨餘田
染翰逢歌扇揮金向酒船
鼇峰孤絕處閒坐似當年

七言律

見于給事暇日上直寄南省諸郎官詩因以戲

贈

唐白居易

倚作天仙弄地仙誇張一日抵千年黃麻勅勝長生錄
白紵詞嫌內景篇雲彩誤居青瑣地風流合在紫微天
東曹漸去西垣近鶴駕無妨更著鞭

休澣日西掖謁所知因成長句

唐溫庭筠

赤墀高閣自從容玉女窓扉報曙鐘日麗九門青瑣闥

雨晴雙闕翠微峰
毫端蕙露滋仙草
琴上薰風入禁松
荀令鳳池春晚晚
好將餘潤變魚龍

省中偶作

唐張喬

三轉郎曹自勉旃
莎階吟步想前賢
不如何遜無佳句
若比馮唐是壯年
捧制名題黃紙尾
約僧心在白雲邊
乳毛松雪春來好
直夜清閒且學禪

雨中放朝出左掖

明文徵明

霏微芳潤浥霓旌
歷落彤墀散履聲
暝色浮煙迷左掖

碧雲將雨近西清
柳垂青瑣千絲重
水落銀橋萬玉鳴
霑灑不辭袍袖濕
天街塵淨馬蹄輕

御定佩文齋詠物詩選卷一百十三

欽定四庫全書薈要卷一萬八千七百三十六

集部

御定佩文齋詠物詩選卷一百十四

館閣類

五言古

賦得謁帝承明廬

陳江總

霧開仁壽殿雲繞承明廬
輪停紺幃引馬度紅塵餘香
貂拜黻袞花綬拂元除謁帝
升清漢何殊入紫虛

五言律

冬夜寓直麟閣

唐
宋之問

直事披三省重關祕七門
廣庭憐雪淨深屋喜爐溫
月幌花虛馥風窓竹暗喧
東山白雲意茲夕寄琴樽

春夜寓直鳳閣懷羣公

唐
魏知古

拜門傳漏晚寓省索居時
昔重安仁賦今稱伯玉詩
駕池滿不溢雞樹久逾滋
夙夜懷山甫清風詠所思

奉和人日清暉閣宴羣臣遇雪應制

唐
宗楚客

窈窕神仙府參差雲漢間九重中禁啟七日早春還太
液天為水蓬萊雪作山今朝上林樹無處不堪攀

七言律

題集賢閣

唐

劉禹錫

鳳池西畔圖書府玉樹玲瓏景氣閒長聽餘風送天樂
時登高閣望人寰青山雲繞闌干外紫殿香來步武間
曾是先賢翔集地每看壁記一慚顏

和劉郎中學士題集賢閣

唐

白居易

朱閣青山高庫齊與君才子作詩題傍聞大內笙歌近
下視諸司屋舍低萬卷圖書天祿上一條風景月華西
欲知丞相優賢意百步新廊不踏泥

憶夜直金鑾殿承旨

唐李紳

月當銀漢玉繩低深聽簫韶碧落齊門壓紫垣高綺樹
閣連青瑣近丹梯墨宣外渥催飛詔草布新恩促換題
明日獨歸花路遠可憐人世隔雲泥

雨後月中玉堂閒坐

唐韓偓

銀臺直北金臺外暑雨初晴皓月中惟對松篁聽刻漏
更無塵土翳虛空綠香熨齒冰盤果清冷侵肌水殿風
坐久忽聞鈴索動玉堂西畔響丁東

陪王庶子遊後湖涵虛閣

宋 徐鉉

懸圃清虛乍過秋看山尋水上茲樓輕鷗的的飛難沒
紅葉紛紛晚更稠風卷微雲分遠岫浪搖晴日照中洲
躋攀況有承華客如在南皮奉勝遊

留題微之廨中清暉閣

宋 王安石

故人名字在瀛洲邂逅低回向此留鷗鳥一雙隨坐嘯
荷花十丈對冥搜水涵樽俎清如洗山染衣巾翠欲流
宣室應疑鬼神事知君能復幾來游

寓直玉堂拜賜御酒

宋范成大

歸鴉陸續墮宮槐簾幙參差晚不開小雨遂將秋色至
長風時送市聲來近瞻北斗璿璣次猶夢西山碧翠堆
慚媿君恩來甲夜殿頭宣勸紫金杯

新館內直

明曾棨

華館深沈直禁闌彩霓丹碧煥翬飛上林萬樹連西掖
北極諸星拱太微繞硯龍香裁詔罷隔簾鶯語退朝歸
應知幾度青綾夜月轉金莖露滿衣

翰林齋宿

明文徵明

春星爛漫燭薇垣獨擁青綾向夜闌宮漏隔花銀箭永
蓮燈垂燼玉堂寒坐聆宵柝霜圍屋想見郊禋月滿壇
鈴索無風塵土遠始知仙署逼金鑾

七言絕句

金鑾坡上南望

唐鄭畋

玉晨鐘韻上清虛
畫戟祥煙拱帝居
極眼向南無限地
綠煙深處認中書

玉堂讀卷雜賦次韻

元虞集

千花覆檻柳垂絲
畫刻傳呼淑景遲
聖主自觀新進策
侍臣簪筆立多時

與趙子期趨閣

虞集

日出風生太液波
畫橋千尺彩船過
橋頭柳色深如許

應是偏承雨露多

詔直內閣即事

明 胡儼

清曉朝回秘閣中
坐看宮樹露華濃
綠窓朱戶圖書滿
人在蓬萊第一峯

其二

浩蕩東風雨散絲
暗移春色上花枝
雲陰半捲龍樓晚
正是詞臣退直時

御定佩文齋詠物詩選卷一百十四

欽定四庫全書薈要卷一萬八千七百三十七 集部

御定佩文齋詠物詩選卷一百十五

院類

五言古

宴韋司戶山亭院

唐 高適

人幽想靈山意愜憐遠水習靜務為適所居還復爾汲
流漲華池開酌宴君子苔徑試窺踐石屏可攀倚入門
見中峯携手如萬里橫琴了無事垂釣應有以高館何

沈沈颯然涼風起

五言律

奉和幸上官昭容院

唐鄭愔

地軸樓居遠天台
闕路賒何如遊帝宅
即此對仙家座
拂金壺電池搖玉酒
霞無云秦漢隔別訪武陵花

其二

槎流天上轉茅宇
禁中開河鵲填橋至
山熊避檻來庭
花采芣苢巖石步
莓苔願奉輿圖泰
長開錦翰裁

辱張常侍題集賢院詩因以繼和

唐

白居易

天祿閣門開甘泉侍從回圖書皆帝籍僚友盡仙才騎
省通中掖龍樓隔上台猶憐病宮相詩寄洛陽來

重修府西水亭院

白居易

因下疏為沼隨高築作臺龍門分水入金谷取花栽遶
岸行初匝憑軒立未迴園西有池位留與後人開

南谿書院

唐

楊發

茅屋往來久山深不置門
草生垂井口花發接籬根
入院將雛鳥攀蘿抱子猿
曾逢異人說風景似桃源

五言排律

集賢書院成送張說上集賢學士賜宴得珍字

一

唐明皇

廣學開書院崇儒引席珍
集賢招袞職論道命台臣
禮樂沿今古文章革舊新
獻酬樽俎列賓主位班陳
節變雲初夏時移氣尚春
所希光史冊千載仰茲辰

奉和聖製送張說上集賢院學士賜宴賦得昇

字

唐
裴 淮

問道圖書盛尊儒禮教興石渠因學廣金殿為賢昇日
月恩光照風雲寵命膺謀謨言可範舟楫事斯憑燕喜
明時洽光輝湛露凝大哉堯作主天下頌歌稱

奉和聖製送張說上集賢院學士賜宴賦得風

字

唐
褚 琬

講習延東觀趨陪盛北宮惟師恢帝則敷教協天工宣

室恩常異金華禮更崇
洞門清永日華綬接薇風
蕙降堯厨翠榴看舜酒紅
文思光萬宇高議待升中

奉和聖製送張說上集賢院學士賜宴賦得華

字

唐韋述

脩文中禁啟改字令名加台座徵人傑書坊應國華賦
詩開廣宴賜酒酌流霞雲散明金闕池開照玉沙掖垣
留宿鳥溫樹落餘花謬此天光及銜恩醉日斜

晚秋集賢院即事寄徐薛二侍郎

唐
常
袞

穆穆上清居沈沈中秘書金鋪深內殿石甃淨寒渠花
樹臺斜倚宮煙閣半虛縹囊披錦繡翠軸卷瓊琚墨潤
冰文繭香銷蠹字魚翻黃桐葉老吐白桂花初舊德雙
遊處聯芳十載餘北朝榮庾薛西漢盛嚴徐侍講親華
宸徵詩步綺疎綴簾金翡翠賜硯玉蟾蜍移秩東南遠
離懷歲月除承明期重入江海意何如

七言律

院中晚晴懷西閣茅舍

唐 杜甫

幕府秋風日夜清
淡雲疎雨過高城
葉心朱實堪時落
堦面青苔先自生
復有樓臺銜暮景
不勞鐘鼓報新晴
浣花谿裏花饒笑
肯信吾兼吏隱名

田將軍書院

唐 賈島

滿庭花木半新栽
石自平湖遠岸來
筍迸隣家還長竹
地經山雨幾層苔
井當深夜泉微上
閣入高秋戶盡開
行背曲江誰到此
琴書鎖著未朝回

夏日題尋真觀李寬中秀才書院

唐

呂溫

閑院開軒笑語闌江山併入一壺寬微風但覺杉香滿
烈日方知竹氣寒披卷最宜生白室吟詩好就步虛壇
願君此地攻文字如鍊仙家九轉丹

寄題華嚴韋秀才院

唐

許渾

三面樓臺百丈峰西巖高枕樹重重晴攀翠竹題詩滑
秋摘黃花釀酒濃山殿日斜喧鳥雀石潭波動戲魚龍

今來故國遙相憶月照千山半夜鐘

貢院憶繼學治書

元馬祖常

棘闈粉署隔重牆校藝分官屬正郎五夜風簾燒蠟燭
九天冰樹劑龍香周旋接武尚書履供帳留茵御史牀
臚唱閤門春色曙侍臣應奏慶雲章

次韻王師魯待制史院題壁

元周伯琦

大安御閣勢苔亭華闕中天壯上京虹繞金堤晴浪細
龍蟠粉堞翠崗平衆星拱北乾坤大萬國朝元日月明

分署玉堂清似水簫韶時聽鳳凰聲

春居玉山院

明
木公

玉嶽峻嶒映雪堂年年有約賞春光
飛紅舞翠鞦韆院擊鼓鳴鉦蹴踘場
遲日醉聽羣鳥哢暖風時送百花香
好山好地堪為樂莫厭尊前累盡觴

五言絕句

書院

宋
趙抃

雨久藏書蠹風高老屋斜
鄰居盡金碧一一梵王家

七言絕句

春日書院

明
魯鐸

門巷春苔隔路蹊
小桃開滿磬池西
枕書眠著無人喚
花裏東風百舌啼

御定佩文齋詠物詩選卷一百十五

欽定四庫全書薈要卷一萬八千七百三十八

集部

御定佩文齋詠物詩選卷一百十六

苑類

五言古

侍宴樂遊苑餞徐州刺史應詔

梁沈約

沃若動龍驂參差凝鳳管金塘草未合玉池泉將滿

遊建興苑

梁紀少瑜

丹陵抱天邑紫淵更上林銀臺懸百仞玉樹起千尋水
流冠蓋影風揚歌吹音踟躕憐拾翠顧步惜遺簪日落
庭光轉方憶屢移陰願言樂未極不道愛黃金

御幸樂遊苑侍宴

陳
張正見

大君臨四表榮光普八埏區中文化洽海外武功宣鳳
下書丹篆龜符著綠編昆明不習戰雲夢豈遊畋軌文
通萬國旌節靖三邊高秋貌姑射睿想屬汾川兩宮明
合璧雙闕帶非煙揚鑾出城觀詔蹕指郊壇禁苑廻雕

輦離宮建翠旂流水奔雷轂追風赴電鞭畫熊飄析羽
金埒響膠弦鳴玉升文砌稱觴溢綺筵獸舞依鐘石鸞
歌應管絃霞明黃鵠路風爽白雲天潦收荷蓋折露重
菊花鮮上林賓早鴈長楊唱晚蟬小臣慚藝業擊壤慕
懷鉛康衢飛駛羽大海滴微涓詠歌還集木舞蹈遂臨
泉願薦南山壽明明奉萬年

五言律

中秋月直禁苑

唐

鄭畋

禁署方懷忝綸闈已再加暫來西掖路還整上清槎恍
惚歸丹地深嚴宿絳霞幽襟聊自適閒弄紫薇花

七言律

苑中

唐

韓偓

上苑離宮望處迷相風高與露盤齊金階鑄出後猊立
玉柱雕成翡翠棲外使調鷹初得按中官過馬不教嘶
笙歌錦繡雲霄裡獨許詞臣醉似泥

從遊西苑

明

楊士奇

廣寒宮殿屬天家
曉從宸遊駐翠華
瓊液總頒仙掌露
金枝皆插御筵花
棹穿萍藻波間雪
旗颭芙蓉水上霞
身世直超人境外
玉盤親捧棗如瓜

春日遊東苑應制

明林鴻

長樂鐘鳴玉殿開
千官步輦出蓬萊
已教旭日催龍馭
更借春流泛羽杯
堤柳欲眠鶯喚起
宮花乍落鳥銜來
宸遊好續簫韶奏
京國於今有鳳臺

秋日再經西苑

明文徵明

內苑秋清宿露晞
盈盈日采動金扉
松間翠殿團華蓋
天外銀橋入紫微
錦纜稀遊青雀暗
璫波無際白鷗飛
彤墻高柳無人折
時見中官一騎歸

七言絕句

漢苑行

唐
張仲素

二月春光變柳條
九天清樂奏雲韶
蓬萊殿後花如錦
紫閣堦前雪未消

其二

回鴈高飛太液池
新花低發上林枝
年光到處皆堪賞
春色人間總未知

其三

春風澹澹影悠悠
鶯轉高枝燕入樓
千步迴廊聞鳳吹
珠簾處處上銀鈎

苑中寓直

明
夏言

湧玉亭前夜放舟
碧荷香淨雨初收
遙看北岸紅煙裏
水殿珠簾盡上鈎

御定佩文齋詠物詩選卷一百十六

欽定四庫全書薈要卷一萬八千七百三十九

集部

御定佩文齋詠物詩選卷一百十七

臺榭類

四言古

靈臺詩

漢班固

乃經靈臺靈臺既崇帝勤時登爰考休徵三光宣精五行布序習習祥風祁祁甘雨百穀蓁蓁庶草蕃廡屢惟豐年於皇樂胥

五言古

臨高臺

齊王融

遊人欲騁望積步上高臺
井蓮當夏吐窓桂逐秋開
花飛低不入鳥散遠時來
還看雲棟影含月共徘徊

登高臺

梁王僧孺

試出金華殿聊登銅雀臺
九路平如掌千門洞已開
軒車映日過簫管逐風來
若非邯鄲美便是洛陽才

宮殿名登高臺詩

陳祖孫登

獨有相思意，聊敬鳳凰臺。
蓮披香稍上月，明光正來離。
鶴將雲散飛，花似雪迴遙。
思竹林友，前窓夜夜開。

宓公琴臺詩

唐高適

皤皤邑中老，自許邑中理。
何必升君堂，然後知君美。
閒門無犬吠，早卧常晏起。
昔人不忍欺，今我還復爾。

登單父陶少府半月臺

唐李白

陶公有逸興，不與常人俱。
築臺像半月，迴出高城隅。
置酒望白雲，商飈起寒梧。
秋山入遠海，桑柘羅平蕪。
水色

綠且明令人思鏡湖終當過江去愛此蹀躞

小臺

唐白居易

新樹低如帳小臺平似掌六尺白藤牀一莖青竹杖風
飄竹皮落苔映鶴迹上幽逕與誰同閒人自來往

新構亭臺示諸弟姪

白居易

平臺高數尺臺上結茅茨東西疏二牖南北開兩扉蘆
簾前後卷竹簟當中施清冷白石枕疎涼黃葛衣開衿
向風坐夏日如秋時笑傲頗有趣窺臨不知疲東窓對

華山三峯碧參差南檐當渭水卧見雲帆飛仰摘枝上
果俯折畦中葵足以充饑渴何必慕甘肥况有好羣從
旦夕相追隨

題嶽麓道卿臺

宋

范成大

山外江水黃江外滿城綠城外杳無際天低到平陸長
煙貫楚尾遠勢帶吳蜀故園東北望遊子闌干曲

七言古

附長短句

春臺望

唐

明皇

暇景屬三春高臺聊四望目極千里際山川一何壯太

華見重巖終南分疊嶂郊原紛綺錯參差多異狀佳氣

滿通溝遲步入綺樓初鶯一一鳴紅樹歸鴈雙雙去綠

洲太液池中下黃鶴昆明水上映牽牛聞道漢家全盛

日別館離宮趣非一甘泉逶迤亘明光五柞連延接未

央周廬微道縱橫轉飛閣迴軒左右長須念作勞居者

逸勿言我後焉能恤為想雄豪壯柏梁何如儉陋卑茅

室陽烏黯黯向山沈夕鳥喧喧入上林薄暮賞餘迴步

輦還念中人罷百金

雍臺歌

唐

溫庭筠

太子池南樓百尺入窓新樹疎簾隔黃金鋪首畫鈎陳
羽葆亭童拂交戟盤紆欄楯臨高臺帳殿臨流鸞扇開
早鴈驚鳴細波起映花鹵簿龍飛廻

五言律

文翁講堂

唐

盧照隣

錦里淹中館岷山稷下亭空梁無燕雀古壁有丹青槐

落猶疑市苔深不辨銘良哉二千石江漢表遺靈

登裴秀才廸小臺作

唐

王維

端居不出戶滿目望雲山落日鳥邊下秋原人外閒遙
知遠林際不見此檐間好客多乘月應門莫上關

凝雲榭晚興

宋

文同

晚策倚危榭羣峰天際橫雲陰下斜谷雨勢落褒城遠
渡孤煙起前村夕照明遙懷寄新月又見一稜生

聚仙臺夜飲

金

元好問

永夜留歡席高懷遠市塵月涼衣有露風細酒生鱗鄉
社情親舊仙臺姓氏新殷勤詩卷在長記坐中人

臺上

明
薛 蕙

臺迴通風榭窓虛近水城捲簾殘暑去携手晚涼生碧
樹藏雲暗銀河度月明醉來愁彷彿只作畫中行

澄江臺

明
王 韋

混合開天塹蒼茫壯帝畿帆檣移夕景樓殿動朝輝落
日波濤隱浮煙島嶼微登臺歌古詠長憶謝玄暉

平臺

明 馬汝驥

曲臺通太乙，複道肅鈎陳。
虎旅歸營久，龍光繞禁新。
柏梁開日月，蓬閣接天人。
漢帝崇文化，賡歌奉紫宸。

秋日登雨花臺

明 陳鳳

落葉山中寺，秋風江上臺。
鳳城雙闕迴，牛渚片帆來。
繁吹暮仍急，清樽醉復開。
東籬菊尚晚，留取盡餘杯。

五言排律

鬱孤臺

宋 蘇軾

入境見圖畫鬱孤如舊遊山為翠浪湧水作玉虹流日
麗崆峒曉風酣章貢秋丹青未變葉鱗甲欲生洲嵐氣
昏城樹灘聲入市樓煙雲侵嶺路艸木半炎州故國千
峰外高臺十日留他年三宿處準擬繫歸舟

立春日山西紀石二使君陳程二閩帥邀遊吹

臺同張職方賦

明
朱睦㮮

驄馬尋芳出高臺野望同人皆惠連輩地即孝王宮宴
對幽林雪歌餘大國風斷垣蒼蘚合遺沼碧流通日轉

平蕪外春歸遠樹中今朝逢賦客懷古意何窮

七言律

朝臺送客有懷

唐

許渾

趙佗西拜已登壇馬援南征土宇寬
越國舊無唐印綬蠻鄉今有漢衣冠
江雲帶日秋偏熱海雨隨風夏亦寒
嶺北歸人莫回首蓼花楓葉萬重灘

凌歊臺送韋秀才

許渾

雲起高臺日未沈數村殘照半巖陰
野蠶成繭桑柘盡

谿鳥引雛蒲稗深帆勢依依投極浦鐘聲杳杳隔前林
故山迢遞故人去一夜月明千里心

亭臺

唐

秦韜玉

雕楹累棟架崔嵬院宇生煙次第開為向西窓添月色
豈辭南海取花栽意將畫地成幽沼勢擬驅山近小臺
清境漸深官轉重春時長是別人來

題睦州郡齋千峰榭

唐

方干

豈知平地似天台朱戶深沈別徑開曳響露蟬穿樹去

斜行沙鳥向池來
窓中早月當琴榻
牆上秋山入酒杯
何事此中如世外
應緣羊祜是仙才

月波臺

宋 朱子

潺潺流水注回塘
中作平臺受晚涼
四面不通車馬跡
一樽聊飲芰荷香
韓公無復吟花島
楚客何勞賦葯房
少待須臾更清絕
月華零露洗匡牀

登擬峴臺

宋 陸游

層臺縹緲壓城闌
倚杖來觀浩蕩春
放盡樽前千里目

洗空衣上十年塵
縈迴水抱中和氣
平遠山如醞藉人
更喜機心無復在
沙邊鷗鷺亦相親

妙高臺

元
李思衍

危亭新構客持觴
雨浥闌干面面涼
煙外好山供水墨
風前老樹奏笙簧
接天淨綠秋江白
著地形雲晚稻黃
騷裊絲鞭歸興逸
水晶宮殿桂花香

華素臺

元
薛元曦

銀臺錯落照長春
泰宇清明絕點塵
星斗九天分楚越

山河萬里界甌閩花邊絳節招猿鶴雲裏丹梯駐鳳麟
戲馬歌風何足數初陽今古對天人

新秋釣魚臺讌集兼贈倪若谷秘書得中字

明
李先芳

古寺涼蟬響晚風釣魚臺近濯龍宮波搖樹色浮天上
山寫秋容入鏡中蓮社舊遊花落盡濠梁樂事鳥啼空
臨流不醉新豐酒笑煞滄浪把釣翁

五言絕句

奉和春日池臺

唐
元萬頃

日影飛花殿風文積草池
鳳樓通夜敞虬輦望春移

臨高臺送黎拾遺

唐
王維

相送臨高臺川原杳何極
日暮鳥飛還行人去不息

望山臺

唐
錢起

望山登春臺目盡趣難極
晚景下平阡花際霞峰色

石臺

宋
朱子

出谷轉石稜俯身窺木末
夕眺嵐翠分朝隲雲海濶

聚遠臺

金趙渢

獨上平臺上風雲萬里來青山一樽酒落日未能回

過越王臺

明僧來復

人道耶谿好青山罨畫開荷花三百里無數白鷗來

七言絕句

嚴陵釣臺

唐黃滔

終向煙霞作野夫一竿竹不換簪裾直釣猶逐熊羆起
獨是先生真釣魚

過雲臺

金

李俊民

夜半風吹霽色開
曉乘殘月過雲臺
連山斷處瞰平野
一線黃流掌上來

釣臺夜興


元

薩都拉

仙茶旋煮桐江水
客火遙分石壁燈
風露滿船山月上
夜涼獨對釣臺僧



御定佩文齋詠物詩選卷一百十七



總校官庶吉士臣侍朝

校對官檢討臣蕭九成

謄錄貢生臣郭棣泰

謄錄監生臣李本

欽定四庫全書薈要

集部

御定詠物詩選卷二百十八

詳校官原任主事臣李斯咏

欽定四庫全書薈要卷一萬八千七百四十

集部

御定佩文齋詠物詩選卷一百十八

亭類

五言古

奉和登百花亭懷荆楚

梁朱超道

亭高登望極春心遠近同
莫謂荆臺隱雲行不礙空柳
色浮新翠蘭心帶淺紅
若因鵬舉便重上龍門中

山亭夜宴

唐王勃

桂宇幽襟積松臺涼夜永森沈野徑寒肅穆巖扉靜竹
晦南阿色荷翻北潭影清興殊未闌林端照初景

夜飲東亭

唐
宋之問

春泉鳴大壑皓月吐層岑
峯壑景色佳慰我遠遊心
暗芳足幽氣驚棲多衆音
高興南山曲長謠橫素琴
四月十三日詔宴寧王亭子賦得好字

唐
張說

何許承恩宴山亭風日好
綠嫩鳴鶴洲陰濃鬪雞道
果

思夏來茂花嫌春去早行樂無限時皇情及芳草

春遊南亭

唐
韋應物

川明氣已變巖寒雲尚擁南亭草心綠春塘泉脈動景
煦聽禽響雨餘看柳重逍遙池館華益愧專城寵

芙蓉亭

唐
柳宗元

新亭俯朱檻嘉木開芙蓉清香晨風送縹彩寒露濃瀟
灑出人世低昂多異容嘗聞色空喻造物誰為工留連
秋月宴迢遞來山鐘

郡亭

唐

白居易

平旦起視事亭午臥掩關除親簿領外多在琴書前況
有虛白亭坐見海門山潮來一凭檻賓至一開筵終朝
對雲水有時聽管絃持此聊過日非忙亦非閒山林本
寂寞朝闕空喧煩唯茲郡閣內囂靜得中間

旅次洛城東水亭

唐

孟郊

水竹色相洗碧花動軒楹自然逍遙風蕩滌浮競情霜
落葉聲燥景寒人語清我來招隱亭衣上塵暫輕

達觀亭

宋 蔡 襄

峭峻釣龍石飛亭壓其端
曠徹四無際因之名達觀
扳雲躋大庭仙路何紆盤
秋明澄遠綠暑霽凝新寒
城郭煙火稠水陸漁樵安
偶暇按民俗適遊心意歡
鳴絃俯清流對酒環蒼山
重拂衣裾淨從帶石嵐還

新作春野亭

蔡 襄

太守職民治詔書勸吾農
載酒事緬邈作室當廨中
況憑軒牖高中視田野功
澹沲沐新澤依微生浮風
江湖

漲新綠山麓延朝紅耕鋤時節動歌謠聲意通慙非佐
理才幸邁頻年豐未厭畎畝樂駕言誰相從

枕流亭

宋
文同

愛此煙景佳開軒故臨水晴暉照寒浪飛影動窓紙倚
檻見魚游卷簾知鴈起憔悴笑湘纍區區詠蘭芷

開先漱玉亭

宋
蘇軾

高巖下赤日深谷來長風劈開青玉峽飛出兩白龍亂
沫散霜雪古潭搖清空餘流滑無聲快瀉雙石硤我來

不忍去月出飛橋東蕩蕩白銀闕沈沈水晶宮願隨琴
高生腳踏赤鯁公手持白芙蓉跳下清冷中

開先漱玉亭

宋朱子

奇哉康山陽雙劍屹對起上有橫飛雲下有瀑布水奔
騰復璀璨佳麗更雄偉勢從山梁外影落明湖裏平生
兩仙句詠歎深仰止三年落星灣悵望眼空眯今朝隨
杖屨得此弄清泚更誦玉虹篇塵襟諒昭洗

張詹事遂初亭

元趙孟頫

青山繚神京佳氣溢芳甸林亭去天咫萬狀爭自獻年
多嘉木合春晚餘花殿雕闌留戲蝶藻井語嬌燕退食
鳴玉珂友于此終宴鐘鼓樂清時衣冠集羣彥朝市塵
不侵圖書味方遠紛華雖在眼道勝安用戰初心良已
遂雅志由此見何事江海人山林未如願

題清華亭

元黃潛

名區滙脩渚流望俯平陸飛雨天際來遠峰淨如沐生
香餘晚華繁陰靄嘉木秀色坐可攬終然不盈掬觸景

幽興多接物道機熟誰能與之遊
食芳飲山淥

題茶陽驛飛亭

元薩都拉

白雲飛出山怒擘蒼峽裂
幽谷濕晴雲絕壁灑飛雪
萬折入滄海龍宮水晶闕
簸揚弄珠人冰簾挂寒月

松江亭

在吳江垂虹橋上

明高啓

泊舟登危亭江風墮輕幘
空明入遠眺天水如不隔
日落震澤浦潮來松陵驛
縣縣洲渚平莽莽葭菼積
憑欄不敢唾下有龍窟宅
帆歸雲外秋鳥下煙中夕
欲炊菰

米飯待月出海白喚起弄珠君聞吹第三笛

七言古

附長短句

西亭子送李司馬

唐岑參

高高亭子郡城西直上千尺與雲齊盤崖緣壁試攀躋
羣山向下飛鳥低使君五馬天半嘶絲繩玉壺為君提
坐來一望無端倪紅花綠柳鶯亂啼千家萬井連迴谿
酒行未醉聞暮雞點筆操紙為君題為君題惜解攜草
萋萋沒馬蹄

宿東谿李十五山亭

唐
王季友

上山下山入山谷
谿中落日留我宿
松石依依當主人
主人不在意亦足
名花出地兩重階
絕頂平天一小齋
本意由來是山水
何用相逢語舊懷

東山亭

宋
文同

朝陽之峰乃天設
曲嶺長岡地盤結
下臨絕澗走縈迴
上聳危亭飛巖岬
晚雲幾處水墨畫
秋樹數番紅綠纈
安能恰會此時閒
靜與詩人吟曉雪

題黃才叔看山亭

宋 楊萬里

春山葉潤秋山瘦
雨山黯黯晴山秀
湖湘山色天下稀
零陵仍復白其眉
作亭不為俗人好
箇竹把茅吾事了
朝來看山佳有餘
為渠更盡一編書

冷泉亭

元 周 權

昔人來自天竺國
縹緲孤雲伴飛錫
天風吹落凝不去
化作奇峰聳空碧
至今裂峽餘雲髓
桂冷松香流未已
翠光圍住玉壺秋
不放晴雷度山趾
道人晏坐無生滅

炯炯層胸照冰雪夜深出定汲清泠寒猿啼斷西巖月

澄虛亭

元郭鈺

匹馬江上行且停蒼松夾道風泠泠波光倒吞落日白
雲氣下接炊煙青山僧獨行掃殘葉水鳥雙飛迴遠汀
主人邀客領奇勝賦詩把酒澄虛亭

五言律

宿羽亭侍宴應制

唐杜審言

步輦千門出離宮二月開風光新柳報宴賞落花催碧

水搖空閣青天繞吹臺聖情留晚興歌管送餘杯

都尉山亭

杜審言

紫藤紫葛蟲綠刺胃薔薇下釣看魚躍探巢畏鳥飛
疎荷已晚枝亞果新肥勝迹都無限只應伴月歸

仙萼亭初成侍宴應制

唐沈佺期

山中氣色和宸賞第中過輦路披仙掌帷宮拂帝蘿
泉臨香澗落峰入翠雲多無異登元圃東南望白河

春日宴宋王簿山亭

唐宋之問

公子政邀歡林亭春未闌攀巖踐苔易迷路出花難窓
覆垂楊暖堦侵瀑水寒帝城歸路直留興接鷓鴣

幸梨園亭侍宴應制

唐
崔湜

年光陌上發香輦鏡中遊草綠鴛鴦殿花明翡翠樓寶
杯承露酌仙管雜風流今日陪遊豫皇恩不可酬

相州北亭

唐
張說

人務南亭少煙霞北院多山花迷徑路池水拂藤蘿萍
散魚時舞林幽鳥作歌悠然白雲意乘興抱琴過

林亭作

唐張九齡

穿築非求麗幽閒欲寄情
寓懷因壤石真意在蓬瀛
苔益山文古池添竹氣清
從茲果蕭散無事亦無營

同蔡孚五亭詠

唐徐晶

章奏中京罷雲泉別業歸
拂琴鋪野席牽柳挂朝衣
翡翠巢書幌鴛鴦立釣磯
幽棲可憐處春事滿林扉

宴榮山人池亭

唐孟浩然

甲第開金穴榮期樂自多
樞嘶支遁馬池養右軍鵞
竹

引攜琴入花邊載酒過山翁來取醉時唱接羅歌

早秋宴張郎中海亭即事

唐
盧象

邑有絃歌宰翔鸞狎野鷗眷言華省舊暫滯海池遊鬱
島藏深竹前谿對舞樓更聞書即事雲物是新秋

陸渾水亭

唐
祖詠

晝眺伊川曲巖間霽色明淺沙平有路流水漫無聲浴
鳥沿波聚潛魚觸釣驚更憐春岸綠幽意滿前楹

題韓少府水亭

祖詠

梅福幽棲處佳期不忘還鳥啼當戶竹花繞傍池山水
氣侵階冷松陰覆座閒寧知武陵趣宛在市朝間

題崔八丈水亭

唐
李白

高閣橫秀氣清幽併在君簷飛宛谿水窓落敬亭雲猿
嘯風中斷漁歌月裏聞閒隨白鷗去沙上自成羣

宴陶家亭子

李白

曲巷幽人宅高門大士家池開照膽鏡林吐破顏花綠
水藏春日青軒秘晚霞若聞絃管妙金谷不能誇

章梓州水亭

唐 杜甫

城晚通雲霧，亭深到芰荷。
吏人橋外少，秋水席邊多。
近屬淮王至，高門薊子過。
荊州愛山簡，吾醉亦長歌。

重題鄭氏東亭

杜 甫

華亭入翠微，秋日亂清暉。
危石歌山樹，清漣曳水衣。
紫鱗衝岸躍，蒼隼護巢歸。
向晚尋征路，殘雲傍馬飛。

過南鄰朱山人水亭

杜 甫

相近竹參差，相過人不知。
幽花歆滿樹，曲水細通池。
歸

客邨非遠殘樽席更移看君多道氣從此數追隨

郡南亭子宴

唐張謂

亭子春城外朱門向綠林柳枝經雨重松色帶煙深
酒迎山客穿池集水禽白雲常在眼聊足慰人心

題裴十六少卿東亭

唐李嘉祐

平津舊東閣深巷見南山卷箔嵐煙潤遮窓竹影閒
傾茶蕪落帽戀客不開闕斜照窺檐外川禽時往還

宴無錫蔡長官西亭

李嘉祐

茅簷閒寂寂無事覺人和井近時澆圃城低下見河興
緣芳草積情向遠峯多別日歸何地停橈更一過

題李將軍山亭

唐郭良

鳳閣將軍位龍門司隸家衣冠為隱逸山水作繁華徑
出重林草池搖兩岸花誰知貴公第亭院有煙霞

夏夜西亭即事寄錢員外

唐耿漳

高亭賓客散暑夜醉相和細汗迎衣集微涼待扇過風
還池色定月晚樹陰多遙想隨行者珊珊動曉珂

玉臺體題湖上亭

唐戎昱

湖入苑西邊
湖頭勝事偏
綠竿初長筍
紅顆未開蓮
蔽日高高樹
迎人小小船
清風長入座
夏月似秋天

題楊侍郎新亭

唐劉商

毘陵過柱史
簡易在茅茨
芳草如花種
脩篁帶筍移
徑幽人未賞
簷靜燕初窺
野客憐霜壁
青松畫一枝

畫居池上亭獨吟

唐劉禹錫

日午樹陰正
獨吟池上亭
靜看蜂教誨
閒想鶴儀型
法

酒調神氣清琴入性靈浩然機已息几杖復何銘

百花亭

唐

白居易

朱檻在空虛涼風八月初山形如峴首江色似桐廬佛
寺乘船入人家枕水居高亭仍有月今夜宿何如

湖亭晚歸

白居易

盡日湖亭臥心閒事亦稀起因殘醉醒坐待晚涼歸松
雨飄藤帽江風透葛衣柳堤行不厭沙軟絮霏霏

題胡氏谿亭

唐

朱慶餘

亭與谿相近無時不有風澗松生便黑野蘚看多紅雨
足秋聲後山沈夜色中主人能守靜略與客心同

光州王建使君水亭作

唐
賈島

楚水臨軒積澄鮮一畝餘柳根連岸盡荷葉出萍初極
浦清相似幽禽到不虛夕陽亭際眺槐雨滴疎疎

谿亭

唐
許渾

谿亭四面山橫柳半谿灣蟬響螳螂急魚深翡翠閒水
寒留客醉月上與僧還猶戀蕭蕭竹西齋未掩關

其二

煖枕眠谿柳僧齋昨夜期
茶香秋夢後松韻晚吟時
共戲魚翻藻爭栖鳥墮枝
重陽應一醉栽菊助東籬

宿宣義池亭

唐
劉得仁

暮色遶柯亭南山出竹青
夜深斜舫月風定一池星
島嶼無人跡菰蒲有鶴翎
此中休便得何必泛滄溟

姚氏池亭

唐
項斯

池館饒佳致幽人愜所聞
篠風能動浪岸樹不遮山
嘯

檻魚驚後眠窓鶴語間何須說廬阜深處便躋攀

早秋遊湖上亭

唐
劉威

危亭秋尚早野思已無窮竹葉一樽酒荷香四座風
曉煙孤嶼外歸鳥夕陽中漸愛湖光冷移舟月滿空

涵碧亭

唐
方干

高低竹雜松積翠復留風路劇陰谿裏寒生暑氣中
閒雲低覆草片水靜涵空方見洋源牧心侔造化工

鄠郊山舍題趙處士林亭

唐
李洞

圭峰秋後疊亂葉落寒虛
四五百竿竹二三千卷書
雲深猿拾栗雨霽蟻緣蔬
只隔門前水如同萬里餘

漢南郵亭

唐裴說

高閣水風清開門日送迎
帆張獨鳥起樂奏大魚驚
驟雨拖山過微風拂面生
閒吟雖得句留此謝多情

題王侍御宅內亭子

唐黃滔

俗間塵外境郭內宅中亭
或有人家創還無蓮幕馨
石曾湖岸見琴誤嶽樓聽
來客頻頻說終須作畫屏

中書相公谿亭宴集依韻

宋 徐鉉

雨霽秋光晚亭虛野興迴沙鷗掠岸去谿水上階來客
傲風歌幘筵香菊在杯東山長許醉何事憶天台

碧巘亭

宋 文同

斷巘綠谿邊危亭翠壁前軒窓誰是客詩酒自稱仙遠
壑春藏雨長波晝起煙吏人休報事高興正陶然

弄珠亭春望

文同

岸柳舞毵毵春濃物象酣煙雲分極浦舟楫聚回潭上

水魚千百眠沙鴈兩三遙懷無可奈長是寄城南

東谿亭

文同

短舸遙遙渡高欄天矯沈波光環堵淨日色綵梁深萍
荇翻金鯽蘭苔點翠禽主人公事簡時此照清襟

蒙亭

宋孫覲

小築三間足雄包萬象并遙波通極浦落日抱孤城小
語千巖應長歌百蟄驚坐看衣屨上漠漠晚雲生

嫣然亭

宋朱子

手種籬間樹枝繁不忍刪
新亭最佳處勝日共歡顏
景晏春紅淺雨餘寒翠潛
光風回巧笑桃李任漫山

過九里亭

宋 楊萬里

水渚纔容足漁家便架椽
屋根些子地簾外不勝天
岸皆垂柳門門一釣船
五湖好風月乞與不論錢

陳伯可山亭

宋 戴復古

梯險登霞外乘流過竹西
寒谿隨雨漲高閣與雲齊
雙鶴有時舞孤猿何處啼
清吟無盡興白石可留題

林臯亭

元 虞 集

九月天氣肅，鶴鳴在林陰。
使君甚好客，來者總能吟。
紅樹秋山近，黃華夕露深。
鄰翁八九十，有酒即相尋。

登山亭

元 薩都拉

山上新亭好，紅塵不可侵。
雨階幽草合，風徑落花深。
野水浮晴色，平田下夕陰。
城中公事少，日日就登臨。

嶽心亭

元 張 翥

何許新亭好，軒窓窈窕深。
天開雲四面，地據嶽中心。
雨

綠蘿蕪道風香簷蔔林曉嵐收不盡猶作半山陰

呂公亭

元 余 闕

鄂渚江漢合茲亭宅其幽我來窺石鏡無得眺芳洲遠
岫雲中沒春江雨外流何時乘白鶴吹笛過南樓

垂虹亭

元 倪 瓚

虛閣春城外澄湖暮雨邊飛雲忽入戶去鳥欲窮天林
屋青西映吳松碧左連登臨感時物快吸酒如川

山亭

明 薛 蕙

西園禁垣東涼生暑漸空小池盈宿雨叢桂易秋風獨
鶴窺雲際幽蘭浥露中來遊行樂地不惜醉山公

內苑涵碧亭

明陳沂

苑入黃金塢橋迴碧樹灣龍池觀九島鼇禁覓三山溜
轉雲車急花深月殿閒從來人罕至御榻在中間

偕方仲美宗良兄再集宛在亭

明朱多炆

一曲君恩重千秋賀監才亭虛水禽集池淨藕花開進

艇涼風送鉤簾返照來誰能與朋好到此不銜杯

五言排律

王屋山第之側雜構小亭暇日與羣公同遊

唐
李嶠

桂亭依絕巘蘭榭俯迴谿綺棟魚鱗出雕甍鳳羽棲引
泉聊漲沼鑿磴且通蹊席上山花落簾前野樹低弋林
開曙景釣渚發晴霓狎水驚梁燕臨風聽楚雞復看題
柳葉彌喜蔭桐圭

白蓮花亭侍宴應制

唐
沈佺期

九日陪天仗，三秋幸禁林。
霜威變綠樹，雲氣落青岑。
水殿黃花合，山亭絳葉深。
朱旗夾小徑，寶馬駐清浔。
苑吏收寒果，饕人饁野禽。
承歡不覺暝，遙響素秋砧。

仙萼池亭侍宴應制

沈佺期

步輦尋丹嶂，行宮在翠微。
川長看鳥滅，谷轉聽猿稀。
天磴扶階迥，雲泉透戶飛。
閒花開石竹，幽葉吐薔薇。
徑狹難留騎，亭寒欲進衣。
白龜來獻壽，仙吹返彤闈。

奉和幸神臯亭應制

唐
宋之問

清蹕喧黃道乘輿降紫宸
霜戈凝曉日雲管發陽春
臺古全疑漢林餘半識秦
宴酣詩布澤節改令行仁
昔恃山河險今依道德淳
多慚獻嘉頌空累屬車塵

鄭郎中山亭

唐
崔翹

篆筆飛章暇園亭染翰遊
地奇人境別事遠俗塵收
書閣山雲起琴齋澗月留
泉清鱗影見樹密鳥聲幽
杜鵑薰梅雨荷香送麥秋
無勞置驛騎文酒暗相求

題獨孤使君湖上林亭

唐
劉長卿

出樹倚朱欄吹饒引上官
老農持鋤拜時稼捲簾看水
對登龍淨山當建隼寒夕陽
湖草動秋色渚田寬渤海
人無事荊州客獨安謝公何
足比來往石門難

裴僕射東亭

唐
錢起

鳳宸任匡濟雲谿難退還
致君超列辟得道在榮班
朱戟繚垣下高齋芳樹間
隔花聞遠水廢卷愛晴山
晚沐值清興知音同解顏
藉蘭開賜酒留客下重關
仙犬逐

人靜朝車映竹閒則知真隱逸未必謝區寰軒后三朝
顧赤松何足攀

杭州盧錄事山亭

唐

朱慶餘

山色滿公署到來詩景饒解衣臨曲榭隔竹見紅蕉清
漏焚香夕輕嵐視事朝靜中看鎖印高處見迎潮曳履
庭蕪近當身樹葉飄傍城餘菊在步入一仙瓢

李氏小池亭十二韻

唐

韋莊

積石亂巉巖庭莎綠不芟小橋低跨水危檻半依巖花

落魚爭唼櫻紅鳥競鷗引泉疏地脈掃絮積山嵌古柳
紅綃織新篁紫綺緘養猿秋嘯月放鶴夜棲杉枕簟谿
雲膩池塘海雨鹹語窓雞逞辨舐鼎犬偏饒踏蘚青粘
屐攀蘿綠蔭衫訪僧舟北渡貫酒日西銜遲客登高閣
題詩遶翠嵒家藏何所寶清韻滿琅函

泉南孫氏園亭

元馬祖常

鑿石通歸汐浮梁看浴暎鳴闌萍上甃鹿柵蘚生垣簷
蔔垂梔子簣當長竹孫書香芸辟蠹席煖錦裁鴛交客

登仙籍承家荷帝恩
冰甌蜂蜜溜酒榼
荔漿翻吹簫花
圍屋彈琴鶴舞園
海雲春有態
閩雪夜無痕
誰謂衣裳
懶予今杖履
煩捋鬚
歌月地翹首望天門

七言律

太平公主山亭侍宴應制

唐
李嶠

黃金瑞榜絳河隈
白玉仙輿紫禁來
碧樹青岑雲外聳
朱樓畫壁水中開
龍舟下瞰鮫人室
羽節高臨鳳女臺
遽惜歡娛歌吹晚
揮戈更却曜靈回

題賈巡官林亭

唐
楊巨源

白鳥閒栖亭樹枝
綠樽仍對菊花籬
許詢本愛交禪侶
陳寔由來足好兒
明月出雲秋館思
遠泉經雨夜窓知
門前長者無虛轍
一片寒光動水池

題友人池亭

唐
溫庭筠

月榭風亭遠曲池
粉垣迴互瓦參差
侵簾白片搖翻影
落鏡紅愁寫倒枝
鸚鵡刷毛花蕩漾
鷺鷥拳足雪離披
山翁醉後如相憶
羽扇清樽我自知

奉同諸公題河中任中丞新葺河亭

唐
李商隱

萬里誰能訪十洲
新亭雲構壓中流
河鯨縱玩難為室
海蜃遙驚恥化樓
左右名山窮遠目
東西大道鎖輕舟
獨留巧思傳千古
長與蒲津作勝遊

許州題德星亭

唐
薛能

潁水南流東有堤
堤邊亭是武陵谿
槎松配石堪僧坐
藥杏含春欲鳥啼
高處月生滄海外
遠郊山在夕陽西

頻來不似軍從事只戴紗巾曳杖藜

題河中亭子

薛能

河擘雙流島在中島中亭子正南空蒲根舊浸臨關道
沙色遙飛傍苑風晴見樹卑知嶽大晚聞車亂覺橋通
無窮勝事應須宿霜白蒹葭月在東

和于中丞登扶風亭

唐方干

避石攀蘿去不迷行時舉步似丹梯東軒海日已相照
下界晨雞猶未啼郭裏雲山全占寺邨前竹樹半藏谿

謝公吟望來登此此地應將峴首齊

再題路支使南亭

方干

行處避松兼礙石即須門徑落斜開相邀舊友看漁釣
貪聽新禽駐酒杯樹影不隨明月去谿流常送落花來
睡時聞得江淹夢五色毫端弄逸才

睦州呂郎中環谿亭

方干

為是仙才登望處風光便似武陵春閒花半落猶迷蝶
白鳥雙飛不避人樹影斜餘侵枕簟荷香坐久著衣巾

暫來此地非多日
明主那容借寇恂

題越州袁秀才林亭

方干

清邃林亭指畫開
幽巖別派象天台
坐牽蕉葉題詩句
卧看藤花落酒杯
白鳥不歸山裏去
紅鱗多向鏡中來
終年此地為吟侶
早起尋君薄暮回

褚家林亭

唐皮日休

廣庭遥帶舊娃宮
竹島蘿谿委曲通
茂苑樓臺低檻外
太湖魚鳥徹池中
蕭疎桂影移茶具
狼籍蘋花上釣筒

爭得共君來此住便披鶴氅對清風

題崔駙馬林亭

唐僧無可

宮花野藥半相和藤蔓參差惜不科纖草連門留徑細
高樓出樹見山多洞中避暑青苔滿池上吟詩白鳥過
更買太湖千片石疊成雲頂綠嵯峨

登涵輝亭

宋孔武仲

常時洲島隔波瀾故覓君山直上看罨畫園林春減色
水晶宮闕畫添寒州城斜引羣峯小湖面平吞數驛寬

坐久西風響喬木扁舟思到武陵灘

太湖恬亭

宋 王安石

檻臨谿上綠陰圓谿岸高低入翠微日落斷橋人獨立
水銜幽樹鳥相依清遊自覺心無累靜處安知世有機
更待夜深同徙倚秋風斜月釣船歸

成都楊氏江亭

宋 文同

汀洲煙雨卷輕霏遙望軒窓隱翠圍萬嶺西來供曉色
一江南下載晴暉鳬鷗慣入闌干宿魚蟹長隨舴艋歸

我亦舊多滄海思幾時如此得苔磯

題潭州徐氏春暉亭

宋蘇軾

朧朧曉日上三竿客向東風競倚闌穿竹鳥聲驚步武
入簷花影落杯盤勿嫌步月臨元圃冷笑乘槎向海灘
勝槩直應吟不盡憑君寄與畫圖看

秋日登海州乘槎亭

宋張耒

海上西風八月涼乘槎亭外水茫茫人家日暖漁樵樂
山路秋晴松柏香隔水飛來鴻陣闊趁潮歸去櫓聲忙

蓬萊方丈知何處煙浪參差在夕陽

次秀野極目亭韻

宋朱子

偶向新亭一破顏高情直寄有無間地偏已隔東西路
天闊長圍遠近山浩蕩祇愁朝霧合輪囷却喜暮雲還
不堪景物撩人甚倒盡詩囊未許慳

飲清湍亭石上小醉再登晝寒朱子

水邊今日共傳杯多謝殷勤數子來三伏炎蒸那有此
百年懷抱頓能開雲山合匝還生霧雪澗翻騰怒吼雷

却恨蒼屏遮遠目凌風直欲跨蓬萊

題張氏新亭

宋 范成大

水楊成幄翠相遮猶有東風管物華
葉底青梅無數子梢頭紅杏不多花
煩將練火炊香飯更引長泉煮鬪茶
約我詩成須疥壁莫嗔歌側似歸鴉

水亭有懷

宋 陸游

漁邨把酒對丹楓水驛憑軒送去鴻
道路半年行不到江山萬里看無窮
故人草詔九天上老子題詩三峽中

笑謂毛錐可無恨書生處處與卿同

池亭夏晝

陸游

造物寧非念老生池亭幽事悉施行
羣魚聚散忽無迹孤蝶去來如有情
小磴落茶紛雪片寒泉得火作松聲
曲肱假寐脩然寤不為敲門夢不成

南海東廟浴日亭

宋楊萬里

南海端為四海魁扶桑絕境信奇哉
日從若木梢頭轉潮到占城國裏回
最愛五更紅浪沸忽吹萬里紫霞開

天公管領詩人眼銀漢星槎借一來

寄題曾子與競秀亭

楊萬里

老夫上下蓼花灘每過君家輒繫船
尊酒燈前山入座孤鴻月底水連天
暄涼書問二千里場屋聲名三十年
競秀主人文似豹不應霧隱萬峯邊

平遠亭

元

尹廷高

野水漫漫接白雲凭闌轉覺興撩人
一川芳草青無際數點遙峰淡不真
煙樹夕陽開畫軸風帆沙鳥伴吟身

箇中儘有閒田地何必桃源更問津

半山亭

元
于石

萬疊嵐光冷滴衣
清泉白石鎖煙扉
半山落日樵相語
一徑寒松僧獨歸
葉落誤驚幽鳥去
林空不礙斷雲飛
層崖峭壁疑無路
忽有鐘聲出翠微

分題翠光亭送李仲常江陰知事

元
陳樵

亭前練水細如縈
亭上君山玉作屏
林斷纔通吳月白

鴈飛不盡楚天青
莓苔著雨長黏石
翡翠迎風欲墮翎
怪得步兵迷望眼
詩成正值酒初醒

題張以中野亭

元倪瓚

人境曠無車馬雜
軒楹只在第三橋
開門草色侵書幌
隔水松聲和玉簫
一榻雲山供夏簟
滿江煙雨看春潮
君能擷取飛霞珮
天際真人近可招

題崇山劉氏園亭

明吳會

西山三疊鬱岿亭
上看山翠欲飄揚
柳小樓風滿席

芙蓉清沼水平橋美人歌處傾金杓仙客來時度玉簫
我欲醉眠花底月滿衣香露夜蕭蕭

方叔先生過詠歸亭

明 沈 石

積雨空林喜夜晴杖藜隨意傍江行天寒木落青山出
日轉沙虛白鳥明漫擬東鄰時釀黍自憐南畝晚歸耕
潁川高士能相過閒把瑤琴膝上橫

坐王氏園亭作

明 劉榮嗣

秋向郊原靜處尋古牆圍繞華門深迂迴窈窕層苔路

青紫丹黃千樹林風定小池開竹影日中高榭合藤陰
孤琴更在西鄰北遙領清商識隱心

題來青亭

明僧德祥

西馬橋分一水灣來青亭子在其間一方席上長留客
三尺窓中只見山落地浮雲須急掃當簷繁木要頻刪
輕嵐嫩紫無朝暮肯與閒情數往還

七言排律

顧氏綠陰亭

元鄭元祐

顧家亭子綠陰陰
楊柳菰蒲岸岸深
鷺下積陂明霽雪
鷺啼叢薄度鎔金
涼雲覆地苔粘屐
疎雨沾衣露滿襟
境曠始知清晝寂
舟行忽見白漚沈
錦香承宇花如霧
星采當階月在林
荷鑊課童栽藥物
開窓傍水候足音
湛癡原自能談易
嵇鍛何妨善鼓琴
況是松醪釀初熟
公餘莫厭客同斟

五言絕句

池西亭

唐

白居易

朱欄映晚樹金魄落秋池還似錢塘夜西樓月出時

陪江州李使君重陽宴百花亭

唐

朱慶餘

閒攜九日酒共到百花亭醉裏求詩境回看島嶼青

迎風亭

唐

朱景玄

山雨留青氣谿颺送早涼時迴石門步階下碧雲光

蓮亭

朱景玄

迴塘最幽處拍水小亭開莫怪闌干濕鷓鴣夜宿來

望湘亭

唐 鄭谷

湘水似伊水，湘人非故人。
登臨獨無語，風柳自搖春。

曹亭

宋 孔平仲

外看江水長，裏見荷花發。
廬阜收白雲，南浦浸明月。

其二

漾舟荷花裏，艤棹綠楊陰。
却上曹亭望，山高江水深。

披錦亭

宋 文同

繁紅層若雲，密綠疊如浪。
青帝下尋春，滿園開步障。

露香亭

文同

宿露濛曉花婀娜清香發隨風入懷袖累日不消歇

秀聚亭

宋陳瓘

曉色春風裏維舟一小亭看山渾不倦待得雪峯青

卷雲亭

宋朱子

西山雲氣深徙倚一舒嘯浩蕩忽褰開為君展遐眺

君子亭

朱子

倚杖臨寒水披襟立晚風相逢數君子為我說濂翁

春露亭書

元劉因

老樹含春容寒泉動幽響念彼山中人風露恣清賞

寄題真定明遠亭

元趙孟頫

未到新亭上先題明遠詩雲間歸鴈小山外夕陽遲

煙波亭

明吳琳

漢水連天闊江雲護曉寒青青山數點最好倚闌看

歸雲亭

明蔡羽

尋幽坐翠微嵐氣濕人衣日暮高亭上雲歸僧未歸

冷泉亭

明 王穉登

暮瀑浮花急春流飲鹿渾潺湲一片雨終日在山門

七言絕句

過崔處士興宗林亭

唐 王維

綠樹重陰蓋四鄰青苔日厚自無塵
科頭箕踞長松下白眼看他世上人

號州後亭送李判官使赴晉絳

唐 岑參

西原驛路挂城頭客散紅亭雨未收君去試看汾水上
白雲猶似漢時秋

西亭春望

唐
賈至

日長風暖柳青青北鴈歸飛入杳冥岳陽城上聞吹笛
能使春心滿洞庭

楊家南亭

唐
白居易

小亭門向月斜開滿地涼風滿地苔此院好彈秋思處
終須一夜抱琴來

宿府池西亭

白居易

池上平橋橋下亭夜深睡覺上橋行
白頭老尹重來宿
十五年前舊月明

高亭

白居易

亭脊太高君莫拆東家留取當西山
好看落日斜銜處
一片春嵐暎半環

宿竇使君莊水亭

白居易

使君何在在江東池柳初黃杏欲紅
有興即來閒便宿

不知誰是主人翁

遊城東王駙馬亭

唐
陸暢

城外無塵水間松
秋天木落見山容
共尋簫史江亭去
一望終南紫閣峯

題候仙亭

唐
沈亞之

新剏仙亭覆石壇
雕梁峻宇入雲端
嶺北嘯猿高枕聽
湖南山色捲簾看

登望雲亭招友

唐
朱慶餘

金夕日人々々々
卷一百一
日日恐無雲可望不辭逐靜望來頻共知亭下眠雲遠
解到上頭能幾人

宿邨家亭子

唐
賈島

牀頭枕是谿中石井底泉通竹下池宿客未眠過夜半
獨聞山雨到來時

題池州貴池亭

唐
杜牧

勢比凌歊宋武臺分明百里遠帆開蜀江雪浪西江滿
強半春寒去却來

題元處士高亭

杜牧

水接西江天外聲，小齋松影拂雲平。
何人教我吹長笛，閒倚春風弄月明。

題隱霧亭

唐魚玄機

春花秋月入詩篇，白日幽閒是散仙。
空捲珠簾不曾下，長移一榻對山眠。

玉泉亭

宋趙抃

潺潺朝暮入神清，落澗通池遶郡廳。
亂石長松山十里，

探源須上玉泉亭

易從師山亭

宋林逋

林表秋山白鳥飛
此中幽致亦還稀
西邨渡口人煙晚
坐見漁舟兩兩歸

登賀園高亭

宋孔平仲

東武名園數賀家
更於高處望春華
深紅淺白知多少
直到南山盡是花

和杜孝錫展江亭

宋韓維

斜日低雲動水光偶尋佳處閱羣芳城闌不隔和風度
吹過千花百草香

谿光亭

宋
蘇軾

決去湖波尚有情却隨初日動簷楹谿光自古無人畫
憑仗新詩與寫成

題趙秀才壁

宋
陳造

日日危亭凭曲闌幾山蒼翠擁煙鬟連朝策馬衝雲去
盡是亭中望處山

再題吳公濟風泉亭

宋 朱子

華林翠澗響風泉
竟日間來石上眠
更結危亭俯幽聽
未妨長作地行仙

拄笏亭晚望

宋 范成大

林泉隨處有清涼
山繞闌干客自忙
谿雨不飛虹尚飲
亂蟬高柳滿斜陽

雲間湖光亭

范成大

微風不動歛濤湍
組練晶晶色界寒
斜照發揮猶未盡

月明殘夜更來看

雨中山行至松風亭忽澄霽

宋 陸游

煙雨千峰擁髻鬟
忽看青嶂白雲間
卷藏破墨營丘筆
却展將軍著色山

登多稼亭曉望

宋 楊萬里

風不能消曉霧痕
天猶未放宿雲根
城腰摺處纔三徑
山背前頭別一邨

中和館後草亭

金 李晏

藤花滿地香仍在松影拂雲寒不收
山鳥似嫌遊客到一聲啼破小亭幽

過濟源登裴公亭用聞聞老人韻

元
耶律楚材

山接晴霄水浸空山光灑灑水溶溶
風迴一鏡揉藍淺雨過千峯潑黛濃

其二

掀髯坐語閒臨水仰面徐行飽看山
竹裏忽聞春雪落

天教著我畫圖間

宿浚儀公湖亭

元楊載

夜宿湖亭水氣涼四更風露濕衣裳空濛霧重前山暗
屋角斜明是月光

題番陽方民心遠亭

元黃清老

柴門垂柳曉啼鴉露徑苔封芍藥芽分得番陽雲一半
自攜春雨種黃花

劉氏水南亭子

明蔣山卿

洛水橋南學士家青林遙對碧山斜春風細雨柴門閉
一樹鶯啼杏子花

小亭即事

明
李先芳

綠楊垂穗噪新鴉竹裏茅亭一徑斜不是山人攜酒至
小園閒煞碧桃花

望湖亭

明
王穉登

亭邊楊柳水邊花落日行人正憶家不及江南湖上寺
木蘭舟裏載琵琶

秋亭

明
僧德祥

十日陰雲雨未收
山中新漲足谿流
杖藜不到閒亭上
恐有秋聲在樹頭

立玉亭

明
僧法聚

山當崖斷孤亭立
竹樹迴環翠萬層
倒看夕陽深澗底
不知雲外有歸僧

御定佩文齋詠物詩選卷一百十八